

INUIT ATAQATIGIIT INATSISARTUNI



13. februar 2022

UPA2022/ 28

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Napparsimasup najugaqarfimmi avataani misissorneqarnerani katsorsarneranilu kiffartuussinerit pillugit Namminersornerullutik Oqartussat nalunaarutaat nr. 2, 24. januar 2005-meersumi §9 meeqqanut arfinillit inorlugit ukiulinnut ingiaqataasinnaasut inuit marlunngortinnissaanik Naalakkersuisunut allanngorteqqullugu aalajangiiffigisassatut siunnersuut.

(Inatsisartunut ilaasortaq Agathe Fontain, Inuit Ataqatigiit)

Tungavilersuut:

§ 9. Meeqqat 15-it inorlugit ukiullit nunagisap avataani angalatillugit katsorsartillugillu angajoqqaaminnik ataatsimik qanigisaminnilluunniit inersimasumik ataatsimik ingiaqateqartinneqarnissaminnut pisinnaatitaaffeqarput.

Taanna allanngortikkusuppara imaasilluni, meeqqat 6-t ataallugit ukiullit, pisinnaatitaaffigaaat angajoqqaatik marluusut imaluuniit inersimasut marluusunik ingiaqateqarsinnaanerannik, Peqqinnissaqarfiup akiligaannik.

Angajoqqaq ataaseq, meerarlu nakorsartikkiarnermi Danmarkimut angalanermi annertuumik tatineqartarput. Napparsimasunik meerarisamik angalaqateqarneq sakoortuujuvoq, eqqarsaatitigut timikkullu atukkatigut. Soorlutaqq immineq sakkortoreersoq misissortinnerup inerneranik tusarlerneqarnissaq, nappaatip takkuteqqissimanera peerussianeranilluuniit.

Siunnersuutip, angajoqqaat marluusut, imaluuniit angajoqqaq aanna, aataaluuniit peqataappata, tusagassaminnut imaannaanngissinnaasumik tapersersoqatigiinnissaannik, periarfississavaai.

Meeqqat mikisut, angalanermi angajoqqaamiit paaqqutarineqarnissaat annertuujuvoq, ingammik meeraq napparsimatillugu.

Angajoqqaat taamatut misissortinnermut, nakorsartinnernullu angalasut, ulloq unnuarlu kisimiillutik isumalluutaasarput. Qasunarsinnaasarpog nanertornarsinnaasarlunilu. Pisussarpassuit, inuit nutaarpassuit, misissortinnerit imaannaanngitsut, meeqqamut 6-llit ataallugit ukiulimmut. Timmisarterluuniit imaannaanngitsuusinnaavoq.

Tamatta takorloorsinnaavarput qanoq imaannangissinnaatiginera.

Siunnersuut akuerineqarpat, periarfissaasinnaajumaarpoq angajoqqaanik pisinnaasunik toqqaarneqarsinnaasoq.

Neriullunga Inatsisartut paasinnilluarumaartut.

Pisortanut aningaasatigut allaffissornikkullu kingunerisassai:

Dronings Ingrid Hospital

§37 nr. 40/2022 naalakkersuisunut apeqquumi akipput Droning Ingrid's Hospitalimi 101-142 akornanni uninngasoqarsimasoq.

Angajoqqaajusup aappaa ilaasalissappat angalanernut agguaqatigiisillugu kr. 9.000,-eqarpat pisortanut ukiumut aningaasartuutaanerulissaaq kr. 1.350.000,- ukiumut uninngasut 150-iuppata, ineqarnermullu agguaqatigiisillugu ullut arfineq-pingasuusarpata naleqassaaq kr. 690.000,-

Danmark

Angajoqqaajusup aappaa Danmarkimut angalanera agguaqatigiisillugu kr. 14.000,-qarpat ukiumut kr. 700.000,- naleqassaaq suliaritikkiartortut 50-iuppata kiisalu uninnganerit agguaqatigiisillugu ullut arfineq-pingasuuppata kr. 361.200,- naleqassaaq

Siunnersuut akuerineqassappat pisortat aningaasatigut kingunissai kr. 3.101.200 annertussuseqassapput.

Nalunaarutip allanngortinnera atorfilittap ukiup sisamararterutaanik affarmillunniit naleqassaaq, aningaasanngorlugu kr. 125.000,- - kr. 250.000,- akornanni.

Namminersortunut aningaasaatigut allaffissornikkullu kingunerisassai:

Namminersortunut kinguneqarnaviannngilaq.

Innuttaasunut aningaasatigut allaffissornikkullu kingunerisassai:

Ilaqutaasut ingiaqataasartut marlunngorneratigut meeraq napparsimasoq toqqissisimanerujussuulluni katsorsarneqarsinnaalissaaq.

Ilaqtariinnut ingiaqataasunut minnerusumik aningaasatigut annaasaqaataassaaq, nunani allani katsorsartinnerup nalaani aningaasarsianik annaasaqaataassammat.